



Ils pirats dalla emprema e secunda classa da Glion e contuorn han presentau duas bellezia coreografias al publicum incantau.

«Dance Fun» – ina historia da success

La grupp da sault «Dance Fun» ha festivau il giubileum da diesch onns

DA SUSI ROTHMUND / ANR

■ Tier «Dance Fun» s'audan 14 gruppas che saltan a Vella, Rueun e Glion. Venderdis, sonda e dumengia ein tuttas gruppas sepresentadas al publicum a caschun dalla fiasta da giubileum da diesch onns. Mintga ga ei la sala da scola a Glion stada fullanada ed en tut han ver 1200 persunas admirau ils pigns e gronds saltunzs e lur show da giubileum cun effects da muscals e da glisch. «Tut ei gartegiau, negin ha sefarg mal, ei ha buca dau larmas, tuts ein i sin tribuna e la fin finala levau enzacontas dallas pintgas nuota calar pli», ha Sonia Lombriser-Camathias resumau cuort e bein l'entira fiasta da giubileum. Per la scolasta da sault e fundatura da «Dance Fun» eis ei buca aschi impurtont che las produziuns gartegien 100% endretg. Ei seigi pli impurtont d'intermediar il plascher da saltar, il plascher da viver ed il sentiment da libertad che quei sport det-

ti. Che quei ei reussiu ad ella ed a sias gidontas e ses gidonters ha franc buc in aspectatur dubitau la fin dall'jamna vargada. Gia las pli pintgas ballerinas da quater onns han dau tut e segir vegn ina ni l'autra dad ellas a star aunc biars onns fideivla alla grupp da sault «Dance Fun». Sco Sonia Lombriser-Camathias di ein las saltunzas ed ils saltunzs da «Dance Fun» ella vegliadetgna da quater onns ensi tochen tier las saltunzas empau pli versadas da 30 onns. Empau loscha astga ella era esser d'haver anflau successuras ord las atgnas retschas. Sco la fundatura sescolechan era ellas adina puspei vinavon ed emprendan ils saults ils pli moderns. Biaslas e buca adina semplas coreografias han ei empriu igl onn vargau e presentau al publicum. Per la fiasta da giubileum ha *Primus Cavegn* mess a disposiziun in indrez da musica professional e gest surpriu la lavur da DJ. *Marcus Lombriser* ha procurau per ina interessanta show da glisch che ha enramau las presentaziuns. El cen-

ter ein denton adina las saltunzas ed ils saltunzs stai ed els han gaudiu il beinmeritau e ferm applaus. A Sonia Lombriser-Camathias, la persuna che ha possibilitau tut quei, han tut ils commembers da «Dance Fun» engraziu cun surdar ad ella sias tschugalatas preferidas ed in per caultschas da saltar dalla color pink. «Sin quellas han tuts suttascret en ner – quei ei coolira – jeu hai plascherun», ha la dunna che spetga en cuort siu quart affon concediu cun in surrir ventireivel. Il regal per las saltunzas ed ils saltunzs vegn empau pli tard en fuorma d'ina biala regurdientscha. *Max Deplazes* ha numnadamein filmau la show da giubileum e mintgin(a) survegn in DVD ch'el(la) sa mussar ad amitgs e confamilars e pli tard forsa schizun als agens pops.

Suenter ina pausa da stad entschivan ils cuors da «Dance Fun» puspei il settember. Interessai astgan s'informar e s'annunziar tier: Sonia Lombriser-Camathias, tel. 081 936 33 93, e-mail: riser@kns.ch



Las pintgas ballerinas han buca duvrau ditg per conquistar ils cors diils aspectaturs.



Era ils pigns saltunzs dalla scoletta da Glion e contuorn han saltau sco gronds.



Duas buobas da scoletta dalla Lumnezia en acziun.

FOTOS D. HALSER



Las pintgas Lumnezianas saltan coreografias sco pigns profis.



La grupp da Breakdance s'auda era tier «Dance Fun».



Ina sorpresa speciala pil publicum.



Sco finiziun han las mussadras da sault – cun Sonia Lombriser-Camathias (secunda da sen.) alla testa – mussau tgei ch'ellas san.